

ՍԻՐՏԸ ԴՐԱԾ ՕԳՆՈՒԹՅԱՆ ՄԵՉ

Այսօր Արցախում է վճռվում համայն հայության ճակատագիրը: Ամեն մի ճշմարիտ հայ հիմա այնտեղ է, օգնում է, ինչույ ի գորու է: Արցախական աշխարհին, նրա ազատության պայքարին սատարելով է պայմանավորված նաև «Արցախ» հայրենակցական միության ծրուցունը: «Արցախ» ապրում, շնչում, գործում է հանուն Արցախի: Երբեմն տեսանելի, շոշափելի է այդ օգնությունը, ավելի հաճախ՝ աննկատ: Բայց հազարավոր փախստականներ, բազմաթիվ վիրավորներ, զոհված ազատամարտիկների ընտանիքներ լավ գիտեն այդ օգնության մասին: Ով թեկուզ մի անգամ մասնակցի միության վարչության ու նախագահության նիստերից մեկին, կհամոզվի, որ այնտեղ հավաքված են հայրենի լեռնաշխարհի համար այրվող մարդիկ: Նըրանցից մեկն էլ Համլետ Հակոբյանն է:

Նա ամեն օր այնտեղ է՝ «Արցախ» հայրենակցական միությունում: Մերթ ինքնամոռի ու լռակյաց է, մերթ՝ հախտոն ու կատակասեր, իսկ ավելի հաճախ պեկոծվում, ափերից դուրս է գալիս: Եվ այս ամենն ունի իր պարզ բացատրությունը. նրա տրամադրությանը բոլոր ելևէջները պայմանավորված են նախ և առաջ Արցախով, Հայաստանի սահմանամերձ շրջաններով, մարտադաշտերից հասնող տխուր կամ հույս ներշնչող լուրերով, վերաբերեն դրանք Մարտակերտի շրջանի հայրենի Մաղավուզին, Հաղրութի շրջանի Մելիքաշեն գյուղին, թե՛ Կապանի, Գորիսի կամ Տավուշի ոմբակոծվող շեներին:

Այս տարվա սկզբներին, երբ Արցախից առաջին ծանր վիրավորներին ուղղաթիռներով հասցրին Երևանի հիվանդանոցները, Համլետ Հակոբյանը բարի և անհանգիստ սրտի մղումով առաջինն այցելության գրնաց իր անծանոթ հայրենակիցներին, կարեկցեց տառապանքի ծովերով անցած երիտասարդներին, տեսավ պատերազմի սուկալի դեմքը: Երբ վիրավորների հոսքը մեծացավ, «Արցախ» հայրենակցականի ղեկավարությունը նպատակահարմար գտավ ստեղծել վիրավոր ազատամարտիկներին օգնող մի հանձնաժողով: Եվ բնական ու հասկանալի է, որ այդ հանձնաժողովի նախագահ ընտրվեց հայրենակցականի վարչության ան-

դամ Համլետ Հակոբյանը: Հանձնախմբի ակտիվիստներ էդիկ Ներսիսյանի, Հասմիկ Հարությունյանի, Սուսաննա Հարությունյանի, Միշա Ազարյանի և մյուսների ջանքերով ցուցաբերվող այդ օգնությունը բազմազան է՝ ըսկըսած ֆինանսական ու նյութական օժանդակությունից, ազատամարտիկներից հանգստյան տներ և բուժարաններ ուղարկելուց, Ստեփանակերտում փախստականների հետ տարվող աշխատանքից և վերջացրած առավել բարդ վիրահատությունների համար արտասահման ուղարկելու հետ կապված ճանապարհածախսերով: Ինչ խոսք, ազատամարտիկները, որ հիմնականում 18—30 տարեկան են, ամենից առաջ կարիք ունեն հոգեկան, բարոյական սատարումի, գթասրտության և մարդկային անկեղծ կարեկցանքի: Ահա թե ինչու Համլետ Հակոբյանի համար, ինչպես ասում են, շաբաթ-կիրակի չկա, օրերով հիվանդանոցներում է, վիրավորներից յուրաքանչյուրից իր սրտի ջերմությունն է բաժին հանում: Նա, հիրավի, գտել է իր իսկական կոչումը, օգնում է մարդկանց՝ սիրտը դրած այդ օգնության մեջ: Մի տեսակ հետին պլան են մղվել և ասես մոռացության տրվել ճարտարագիտության համալսարանի փիլիսոփայության ամբիոնի դոցենտությունը, հարմարավետ աշխատավայրը, գիտական շրջապատը... Նա հիմա հայրենիքի շաքքային զինվորն է և այս ճանապարհով է ինքնամոռաց օգնում Արցախի ազատամարտին, դրա մեջ գտնելով իր տառապալից երջանկությունը:

Երևանի 17 հիվանդանոցներում բուժվող վիրավոր ազատամարտիկներից ցույց տրված մեծ օգնության մեջ իրենց բաժինն ունեն նաև մի շաքք հիմնարկ-ձեռնարկություններ՝ «Գարուն» արտադրական միավորումը, մսի կոմբինատը, «Մասիս—7» կոշիկի ֆաբրիկան, «Գարդման» հասարակական կազմակերպությունը, այլ ձեռնարկություններ ու կազմակերպություններ, կոոպերատիվներ, անհատ բարեգործներ: Այդ աշխատանքները կոորդինացրել է «Արցախ» հայրենակցականը՝ վիրավոր ազատամարտիկներին օգնելու համար ստեղծված հանձնաժողովի միջոցով:

Ռուբեն ԳՐԻԳՈՐՅԱՆ